



অবশেষে সেই দিনটি এল। শেষের সেই শোকাবহ দিনটি ঘনিয়ে এল হর্ষবর্ধনের জীবনেও...

আমার সঙ্গে কথা কইতে কইতে হঠাৎ যেন তিন ধকতে লাগলেন। বললেন, বৃকের ভেতরটা কেমন যেন করছে। কন কন করছে কেমন! বলতে বলতে শূয়ে পড়লেন সটান।

বৃকতে আর বাকি রইল না। রোজ সকালের দৈনিক খুলেই যে-খবরটা সব প্রথম নজরে পড়ে—তেমন খবর একটা না একটা থাকেই রোজ—কালকের কাগজ খুলেও আরেকটা সেইরকমের দুসংবাদ দেখতে পাব টের পেলাম বেশ।

যে-খবরে আত্মীয়বিয়োগ নয়, আত্মবিয়োগের ব্যথা অনুভব করে থাকি আমরা তো উচ্চ রক্তচাপজনিত হার্টের দোষ ঐ—রোজই যে খবর পড়ে আমার বৃক ধড়ফড় করে আর মনে হয় আমিই যেন মারা গেলাম আজ, আর আধঘণ্টা ধরে প্রায় আধমড়ার মতই পড়ে থাকি বিছানায় মনে হলো তেমন ধারা: একটা খবর যেন আমার চোখের ওপর ঘটতে চলেছে এখন।

কর্দন ধরেই ভদ্রলোকের শরীর তেমন ভালো যাচ্ছিল না, বৃকের বাঁ দিকটা কেমন একটা ব্যথা বোধ করছিলেন—দেখাই দেখাই করে, কাজের চাপে পা... হাভারে আর ডাক্তার দেখানো হয়ে উঠেছিল না... অবশেষে দিন

ডাক্তারের দেখাশোনার একেবারেই বার হতে চলেছেন...মারাত্মক সেই করোনার প্রম্বোসিস্ এসে তাঁর হৃদয়ের দ্বারদেশে দাঁড়িয়ে কড়া নেড়েছে এখন।

তাহলেও ডাক্তার ডাকতে হয়।

ছুটলাম ট্যাকসি নিয়ে রাম ডাক্তারের কাছে। এই এলাকায় নামকরা ডাক্তার বলতে গেলে তিনিই একমাত্র।

গিয়ে ব্যাপারটা বলতেই রাম ডাক্তার গুম হয়ে গেলেন। কিছু না বলে দ্রুত করে তাঁর বিখ্যাত ডাক্তারি ব্যাগর ভেতর থেকে একটা অ্যামপিউল বার করে নিজের ইনজেকশনের সিরিঞ্জে ভরলেন।

ভয় খেয়ে আমি বলি—‘আজ্ঞে না, আমি নই। আমার কিছু হয়নি। কোনো অসুখ করেনি আমার। দোহাই আমাকে যেন ইনজেকশন দেবেন না। হর্ষবর্ধনবাবুর বুদ্ধেই বলতে বলতে আমি সাত হাত পিঁছিয়ে গেলাম ভয় খেয়ে। রাম ডাক্তারের ঐ এক ব্যারাম, অসুখের নাম করে কেউ সামনে এলে, কাছে পেলেই, ধরে তাকে এই ইনজেকশন ঠুকে দেন।

তিনি আমার কথাগুলো কোনো জবাব না দিয়ে সিরিঞ্জ হাতে বিনা বাক্যব্যয়ে সেই ট্যাকসিতে গিয়ে উঠলেন। সিরিঞ্জ হাতে নামলেন ট্যাকসির থেকে আমার হাতে তাঁর ডাক্তারি ব্যাগ গিঁছিয়ে দিয়ে।

গিয়ে দেখি হর্ষবর্ধন বিছানায় লম্বমান। দেখেই বুঝলাম হয়ে গেছে! দেহরক্ষা করেছেন ভদ্রলোক।

সিরিঞ্জটা আমার হাতে দিয়ে--‘ধরুন, এটা ততক্ষণ’ বলে রাম ডাক্তার হর্ষবর্ধনের নাড়ি টিপে দেখলেন। তারপর স্টেথোস্কোপ বসালেন। অবশেষে গষ্ঠীর মুখে জানালেন সব শেষ।

আমি ‘ফল ধরবে লক্ষ্মণের’ মতন তাঁর সিরিঞ্জ হাতে কম্পাউন্ডারের দুলক্ষ্মণের ন্যায় দাঁড়িয়ে আছি তখনো।

‘দিন ত সিরিঞ্জটা—’ আমার দিকে তাকিয়ে তিনি বললেন—‘ওষুধটা আর নষ্ট করব না। ওঁর নাম করে সিরিঞ্জে যখন ভরেছি তখন ইনজেকশনটা পরবাদ না করে দিয়েই যাই বরং ওঁনাকে।’

বলে মড়ার উপরে খাঁড়ার ঘা মারার মতই ইনজেকশনটা স্বর্গাত তাঁর বুদ্ধের ওপর ঠুকে দিয়ে ভিজিটের টাকাগুলো গুনে নিয়ে ব্যাগ হাতে ট্যাকসিতে গিয়ে চাপলেন আবার।

হর্ষবর্ধনের বৌ পা ছড়িয়ে কাঁদতে বসলেন। আমি একখানা সাদা চাদর দিয়ে ঢেকে দিলাম শবদেহকে।

গোবর্ধন চোখের জল মুছে বলল—‘কাম্মা পরে। ভায়ের কাজ করি আগে। আমি নিউ মার্কেটে চললাম, ফুল নিয়ে আসি গে। তারপর খাট সাজাতে হবে। আপনি যদি পারেন তো ইতিমধ্যে কীর্তনীয়াদের ডেকে নিয়ে আসুন—বন্ধুর কর্তব্য করুন।’

‘তার আগে চাই ডেথ সার্টিফিকেট।’ আমি জানাই : ‘তা না হলে ও মড়া নিয়ে কেণ্ডাতলায় ঘেঁষতেই দেবে না। তাড়াহুড়োর মধ্যে ডাক্তারবাবু চলে গেছেন ভুলে—ডেথ সার্টিফিকেটটা না দিয়েই—সেটা লিখিয়ে আনিগে তাঁর কাছ থেকে। তার পরে ফেরার পথে তোমরা সংকীর্তন পার্টির খবর নেব নাহয়।’

ডেথ সার্টিফিকেট পেলাম কিন্তু কেতনুদের খোঁজ পাওয়া গেল না। তারা যে কোথায় থাকে, কোথায় যায় কেউ তা বলতে পারল না। শুধু এইটুকু জানা গেল যে আজকাল নাকি তাদের ঘোর চাহিদা। ঘৃত দুগ্ধপুষ্ট মনস্বী যতো বড় লোকদের মড়ক যেন লেগেই আছে চারধারে এখন।

ডেথ সার্টিফিকেট হাতে দরজাতে পা ঠেকাতেই চমকে উঠতে হলো। বাড়িতে পা দিতেই যার কন্দন ধ্বনি কানে আসছিল তিনি আতর্জনাদ করে উঠছেন যে অকস্মাৎ।

তুকে দেখলাম, হর্ষবর্ধনের স্ত্রীও নিপ্রাণ নিস্পন্দ সটান!

‘সতীসাধবী সহমরণে গেলেন!’ বলে তাঁর পায়ে হাত ঠেকিয়ে নমস্কার করে নাকের গোড়ায় হাতটা ঠেকাতেই—ওমা! নিশ্বাস পড়ছে যে বেশ! অজ্ঞান হয়ে গেছেন মাত্র।

মুখে চোখে জলের ঝাপটা দিতেই নড়েচড়ে উঠে বসলেন উনি।

‘হঠাৎ অমন করে চেঁচিয়ে উঠলেন যে! হয়েছিল কী?’ আমি জিজ্ঞেস করি।

তিনি ভীতিবিহ্বল নেত্রে বিগত হর্ষবর্ধনের দিকে অঙ্গুলি নির্দেশ করে বললেন—‘নড়িছিল যেন মনে হলো।’ বলে নিজের আশঙ্কাটা ব্যক্ত না করে পারলেন না—‘শনিবারের বারবেলায় গন্ত হলেন, দানোয় পায়নি ত? ভূত-প্রেত কিছুর হর্নান ত উনি?’

‘প্রেতযোনি প্রাপ্ত হয়েছেন কিনা শূধোচ্ছেন? তা কি করে হয়? ওঁর মতন দানব্রত পুণ্যাত্মা লোক সটান স্বর্গে চলে গেছেন। উনি ত ভূত হবেন না—না কোনো ভূত ওঁর দেহে ভর করতে পারবে।’ বলে, মুখে সাহস দিই বটে কিন্তু সত্যি বলতে আমার বুক কেঁপে ওঠে—‘রাম নাম করুন, তাহলেই আর কোনো ভয় নেইকো।’

‘আমার শ্বশুর ঠাকুরের নাম যে, করি কি করে?’ তিনি বলেন—‘আপনি করুন বরণ।’

‘আমাকে আর করতে হবে না রাম নাম। আমার নামের মধ্যেই স্বয়ং রাম আছেন, তার ওপর আমার হাতে সাক্ষাৎ রাম ডাক্তারের সার্টিফিকেট—এই দেখুন—ভূত আমার কাছে ঘেঁষবে না।’

দেখতে দেখতে হর্ষবর্ধন নড়েচড়ে উঠে বসলেন বিছানার ওপর। খানিকক্ষণ যেন অবাক হরে তাকিয়ে রইলেন চারদিকে। তারপর নিজেকে চিমাটি কেটে দেখলেন বারকয়েক—‘নাঃ বেঁচেই আছি বটে।’ বলে তারপর শূধোলেন

‘আমাদের—‘শিবরাম বাবু ! আপনি অমন গোমড়া মুখে দাঁড়িয়ে কিসের জন্যে ?  
গাল, তোমার চোখে জল কেন গো ?’

কারো কোনো বাক্যসুধীর্ষ না দেখে আপন মনেই যেন শুধালেন আবার—  
‘কী হয়েছিল আমার ?’

প্রশ্নটা আমার উদ্দেশ্যে নিষ্কপ্ত মনে করে আমি তাঁকে পালটা জিজ্ঞেস  
করলাম—‘আপনিই ত বলবেন আপনার কী হয়েছিল।’

‘কিছুই হয়নি।’ তিনি জানালেন তখন—‘একটা ভারী বিচ্ছিন্ন দৃশ্য  
দেখিছিলাম যেন। এই রকমটাই মনে হচ্ছে এখন।’

‘কিছুই হয়নি তাহলে। আপনি কিছু আর ভাববেন না। কতাকে গরম  
গরম এক কাপ কফি কব্ব দিন তো।’ বললাম আমি শ্রীমতীকে।

তিনি দু কাপ কফি করে নিয়ে এলেন—আমার জন্যও এক কাপ ঐ  
সঙ্গে।

কফির পেয়ালা নিঃশেষ করে তিনি বললেন—‘আপনার হাতের কাগজটা  
কী দেখি তো।’

কাগজখানা হস্তগত করে নাড়াচড়া করলেন খানিকক্ষণ, তারপর বললেন—  
‘ডাক্তারদের প্রেসকৃপশকের মাথামুণ্ডু কিছু যদি বোঝা যায় ! কম্পাউন্ডাররাই  
বুঝতে পারে কেবল।’

ইতিমধ্যে গোবরা কয়েক তোড়া ফুল নিয়ে এসে হাজির।

‘এত ফুল কিসের জন্যে রে ? ব্যাপার কি আজ ?’ অবাক হয়ে শূন্যে  
তিনি।

‘আজ যে আপনারদের বিয়ের তারিখ তা একদম মনে নেই আপনার ? সে  
কারণে আমার কথায় গোবর্ধন ভায়া ফুল কিনে আনতে গিয়েছিল বাজারে।  
নতুন ফুলশস্যার দিন নই আজ আপনার ?’

‘বিয়ের তারিখ কবি আজ ? তাই নাকি ? একেবারেই মনে ছিল না  
আমার !’ বলে আপন মনেই যেন তিনি গজরান—‘মনেও থাকে না তারিখটা।  
রাখতেও চাইনে মনে করে। বিয়ের তারিখ তো নয়, আমার তারিখ। অপমৃত্যুর  
দিন আমার।’

আমি একবার বক্রস্বাক্ষে শ্রীমতী হর্ষবর্ধিনীর দিকে তাকাই। তিনি কিছু  
বলেন না। তাঁর ভাবুকী মুখ যেন আরো ভারী হয়ে উঠছে দেখা যায়।

হর্ষবর্ধন রাম ডাক্তারের সার্টিফিকেটখানা গোবরার হাতে দিয়ে বললেন—  
‘যা তো গোবরা ! রাম ডাক্তারের এই প্রেসকৃপশনটা নিয়ে সামনের ডিসপেন-  
সারীর কম্পাউন্ডার বাক্সে দে গিয়ে—যেন এই ওষুধটা চটপট বানিয়ে দেন  
দয়া করে।’

গোবর্ধন বেরিয়ে গেলে আমার দিকে ফিরলেন তিনি—‘ঘুমিয়ে ঘুমিয়ে  
অদ্ভুত এক স্বপ্ন দেখলাম গশাই বলব স্বপ্নটা ! আপনাকে একসময়।’

আপনি গল্প লিখতে পারবেন তার থেকে। কিন্তু স্বপ্ন দেখে আমি তেমন অবাধ হয়নি মশাই স্বপ্ন আমি প্রায়ই দেখি, ঘুমোলেই স্বপ্ন দেখতে হয়। কিন্তু এই অবলোয় হঠাৎ এমন ঘুমিয়ে পড়লাম কেন, এমন তো ঘুমোই না, তাই ভেবেই আমি অবাধ হচ্ছি আরো।’

‘ঘুমের আবার বেলা অবেলা আছে নাকি?’ ঘুমের তরফে সাফাই গাইতে হয় আমায়—‘সব সময়ই হচ্ছে ঘুমের সময়। তার ওপর রাতের বেলা ত বটেই। যখন ইচ্ছে ঘুমোন। আমি তো সময় পেলেই একটুখানি ঘুমিয়ে নিই মশাই! অসময়ে ঘুমোই আবার। ঘুমোতে তো আর ট্যাকসো লাগে না...’

বলতে বলতে গোবর্ধন একটা শিশি হাতে ফিরে এল—‘এই মিকচারটা বানিয়ে দিল কম্পাউন্ডার। তিন ঘণ্টা বাদ বাদ খাবে। এক দাগ খেয়ে ফ্যালো চট করে একঘূনি।’

হর্ষবর্ধন এক দাগ গিলে যেন একটু চাপা বোধ করলেন—‘বাঃ বেড়ে ওষুধ দিয়েছে তো! খেতে না খেতেই বেশ সুস্থ বোধ করছি। থাক প্রেসকৃপশনটা আমার কাছে।’ বলে গোবর্ধনের হাত থেকে সেই ডেথ-সার্টিফিকেটখানা নিয়ে নিজের বালিশের তলায় গুঁজে রাখলেন তিনি—‘মনে হচ্ছে ওটা খেয়ে যেন নবজীবন লাভ করলাম। চালিয়ে যেতে হবে ওষুধটা। রাম ডাক্তারের দাবাই বাবা! ডাকলে সাড়া দেয়!’

‘আপনার এয়োতির জোরেই বেঁচে গেছেন উনি এ যাত্রা!’ কানে কানে ফিসফিস করে এই কথা বলে ওঁর বোয়ের হাসিমুখ দেখে আর ওঁকে বহাল তবিয়তে রেখে ওঁদের বাড়ি থেকে বিদায় নিলাম সেদিন।

দিন কয়েক বাদে হর্ষবর্ধন রাম ডাক্তারের বাড়ির পাশ দিয়ে যাচ্ছিলেন, এমন সময় এক পশলা বৃষ্টি আসতেই তিনি বাড়ির দোর গোড়াটায় গিয়ে দাঁড়ালেন।

তারপর সেখানেও বৃষ্টির ছাঁট আসছে দেখে ভাবলেন, রাম ডাক্তারের ওষুধ খেয়ে এমন ভালো আছেন, তাঁর সঙ্গে একবার দেখা করে ধন্যবাদটা জানিয়ে যাই।

ভেবে যেই না তাঁর চেম্বারে ঢোকা রাম ডাক্তার তো আঁ আঁ করে আঁতকে উঠেছেন তাঁকে দেখেই না!

‘ডাক্তারবাবু! ডাক্তারবাবু! চিনতে পারছেন না আমায়? আমি শ্রীহর্ষবর্ধন।’ ‘তাড়াতাড়ি তিনি বলেন ‘আপনার ওষুধ খেয়ে আমি ঢের ভালো আছি এখন। বৃষ্টির সেই ব্যাটাও নেই আর। সেই কথাটাই বলতে এলাম আপনাকে।’

‘আমি তো কোনো ওষুধ দিয়ে আসিনি আপনাকে। শুধু একটা

কোরামিন ইনজেকশন দিয়েছিলাম কেবল তবে...কি, তারই রি-অ্যাকশনেই আপনি পুনর্জীবন...

‘সে কি ! আমাকে দেখে এই প্রেসকৃপশনটা দিয়ে আসেননি আপনি ?’  
বাধা দিয়ে বললেন হর্ষবর্ধন : ‘কাগজখানা সেই থেকে আমি বৃকে করে রেখেছি যে। কখনো কাছ ছাড়া করিনে। আপনার এই প্রেসকৃপশনের গুণুথ খেয়েই ত আমি নবজীবন লাভ করলাম মশাই !’

কাগজখানা তিনি বাড়িয়ে দিলেন রাম ডাক্তারের দিকে।

‘প্রেসকৃপশন ? দেখি—আ—এটা তো আপনার ডেথ সার্টিফিকেট—  
আমিই দিয়েছিলাম বটে।’

‘ডেথ সার্টিফিকেট ?...আ ?’ এবার আতকাবার পালা হর্ষবর্ধনের। কাঁপতে কাঁপতে সামনের চেয়ারটায় বসে পড়লেন তিনি।

‘আমার ডেথ সার্টিফিকেট ? তাই-ই বটে !’ খানিকটা সামলে নিয়ে তিনি বললেন তারপর—‘তাহলে ঠিকই হয়েছে। আমার সেই ভীষণ স্বপ্নটার মানে আমি বৃঝতে পারছি এখন...এতকণে বৃঝলাম।’

‘আপনি কি তাহলে মারা যাননি না কি ?’

‘তাহলে কি এখন ভূত হয়ে...’ ভয় খেলেও তেমন ভয়াবহ কিছু নয় বিবেচনা করে ডাক্তার তত ধাবড়ালেন না এবার—‘দেখুন স্বর্গীয় হর্ষবর্ধন-বাবু ! আমার কোনো দোষ নেই। আমি আপনাকে মারিনি ! সে স্মরণে আমি পাইনি বলতে গেলে। আমি গিয়ে পৌঁছবার আগেই আপনি খতম হয়েছিলেন ...।’

‘না না, আপনার কোনো দোষ দিচ্ছনে। আমি মারা গেছলাম ঠিকই। আমার নিজগুণেই মরেছিলাম। আপনার ডেথ সার্টিফিকেটেও কোনো ভুল হয়নিকো। যমালয়েও নিয়ে গেছল আমায়। ঘটনাটা যা হয়েছিল বলি তাহলে আপনাকে। যমালয়ের ফেরতা বেঁচে ফিরে এলাম কি করে আবার—  
শুনলে আপনি অবাক হবেন।’

সন্দেহ একেবারে না গেলেও রাম ডাক্তার উৎকর্ণ হন।

‘যমদূতেরা নিয়ে গিয়ে যমরাজার দরবারে তো হাজির করল আমায়।’—  
বলে যান অভূতপূর্ব হর্ষবর্ধন—দেখলাম, বিরাট সেরেশ্চার সামনে সিংহাসনে বসে আছেন যমরাজ। সামনে দপ্তর নিয়ে বসে তাঁর চিত্রগুপ্ত, কেউ না বলে দিলেও, তাঁর দিকে তাকালেই তা মালুম হয়। যমদূতরা সব ইতস্তত খাড়া।

যমরাজ আমাকে দেখে গুপ্তমশাইকে ডেকে বললেন—‘দেখত হে, এর পাপ-  
পুণ্যের হিসাবটা দ্যাখো তো একবার।’

খাঁতয়ান দেখে চিত্রগুপ্ত জানালেন—‘প্রভু ! এর পুণ্যকর্মই বোশ দেখছি।  
তবে পাপও করেছে কিছু কিছু।’

‘কী পাপ ?’

‘আজ্ঞে ভ্যাজালের কারবার। ভারতখণ্ডের বেশির ভাগ লোকই যা করছে আজকাল।’

‘কিসে ভ্যাজাল দিত লোকটা?’

‘কাঠের ভ্যাজাল।’

‘প্রভু! কাঠ কি কোনো খাবার জিনিস না ওষুধপত্র, যে তাতে আমি ভ্যাজাল দিতে যাব?’ প্রতিবাদ না করে পারলাম না আমি—‘কাঠ কি কেউ খায় কখনো? না, কাঠে কেউ ভ্যাজাল দিতে যায়? কাঠের আবার ভ্যাজাল হয় না কি?’

‘কিছু হয়েছে। চিত্রগুপ্ত বললেন—‘লোকটা দামী সেগুন কাঠ বলে বাজে বেগুনকাঠের ভ্যাজাল চালাত।’

‘আপনি অবাক করলেন গুপ্তমশাই!’ আমি বললাম তখন—‘পাট গাছ থেকে যেমন খান হয়ে থাকে, সেই রকম কথাটাই বলছেন না আপনি? বেগুন গাছের থেকে কাঠ হয় নাকি আবার? পাটগাছের থেকে তবু পাটকাঠ মেলে, কিছু বেগুন গাছের থেকে কাঠ দূরে থাক একটা কাঠিও যে পাওয়া যায় না মশাই!’

‘বেগুন মানে গুণহীন, নিগূর্ণ, বাজে।’ ব্যাখ্যা করে দিলেন চিত্রগুপ্ত। ‘দামী বলে বিলকুল বাজে কাঠ ছেড়েছ তুমি বাজারে।’

কথাটা মেনে নিতে হয় আমার।—‘তা ছেড়েচি বটে প্রভু! কিছু দেখুন, শাস্ত্রেই বলেছে আমাদের—মহাজনো যেন গতঃ সং পন্থা। সদা মহাজনদের পথে চলবে। আমিও সদা সিন্ধে তাই চলছি। মহা মহা ব্যক্তির কে নয়?—নানাভাবে ভ্যাজাল চালাচ্ছে এখন—বেপরোয়া চালিয়ে যাচ্ছে—তাই দেখে আমিও...’

যমরাজ বাধা দিলেন আমার কথায়—‘চিত্রগুপ্ত, এর জন্য, কতদিন নরকবাসের দণ্ড দেয়া যায় লোকটাকে?’

‘ধর্মরাজ! বিশ বছর তো বটেই। পাপের বিষ ক্ষয় হতে ঐ বিশ বছরই যথেষ্ট—বিশে বিষক্ষয় হয়ে যাক...তবে এর স্বর্গবাসের সময়টাই ঢের বেশি আরো...।’

ধর্মরাজ তখন আমার দিকে তাকালেন—‘তুমি আগে স্বর্গভোগ করতে চাও, না নরকভোগটাই করবে আগে?’

‘যা আপনি মঞ্জুর করবেন!’ কৃতাজলিপদে আমি বললাম। আমার কথার কোন জবাব না দিয়ে যমরাজ নিজের হাতের নোখগুলো খুঁটিয়ে খুঁটিয়ে দেখতে লাগলেন। দেখলাম, তাঁর হাতের নোখগুলো বেড়েছে বেজায়—দেখবার মতই হয়েছে সত্যি!

বললাম—‘অবিলম্বে আপনি নোখ কাটার দরকার কর্তা! বছো বড় হয়েছে যথার্থই! যদি অনর্মান্তি করেন আর একটা নরুণ পাই, অভাবে ব্রেড, তাহলে আমিই কেটে দিতে পারি।’

‘নোখ না, আমি নখদর্পণে তোমার কলকাতার পরিস্থিতিটা দেখিছিলাম।’

‘আজ্ঞে, কলকাতায় আমার কোনো পরিস্থিতি নেই। আমার পেঙ্গুইস্থিতি। আমার বাড়িতে যিনি আছেন কোনো ক্রমেই তাঁকে পরি বলা যায় না। পেঙ্গুই বললেই ঠিক হয়। এমন দৃষ্টিগত ঘ্যানঘেনে আর খ্যানখেনে কুঁদুলে বৌ আর দুর্দাট এমন দেখিনি। পেঙ্গুই নিয়েই হয়েছে আমার ঘর করা...।’

‘যদি তোমাকে বাঁচিয়ে আবার তোমার বাড়িতে ফিরিয়ে দেওয়া হয়?’


‘দোহাই হুজুর, তাহলে আমি মারা পড়বো। মারা যাবো আবার আমি। এমন বোয়ের কাছে আমি ফিরে যেতে চাইনে, তার চেয়ে নরকেও যাব আমি বরং।’

‘দেখিছিলাম তাই। তোমার ঘরের পরিস্থিতি এই, বাইরের পরিস্থিতি যা দেখছি কলকাতায় তা আরো ভয়াবহ...রাস্তায় খানাখন্দ, আর আঁশাকুড়ের গন্ধ, যত রাজ্যের জঞ্জাল। ট্রামে বাসে বাদুড়ঝোলা হয়ে যাচ্ছে মানুষ, রাস্তায় রাস্তায় শোভাযাত্রা, আঁপসে আঁপসে ঘেরাও, চালে কাঁকর, তেলে ঘিয়ে ভেজাল, চিনিতে বালি, বালিতে গঙ্গামাটি, দুধে জল যে রকমটা দেখলাম আমার এই নখদর্পণে তাতে মনে হয় কলকাতাটাই এখন নরক হয়ে দাঁড়িয়েছে। কত বললে চিত্রগুপ্ত! বিশ বছরের নরকবাস না! তোমার আয়ু বিশ বছর বাড়িয়ে দেওয়া হলো আরো। যাও, গিয়ে তোমার কলকাতা গুলজার করো গে।’

‘আর, তারপরই আমি বেঁচে উঠলাম তৎক্ষণাৎ।’ বলে হর্ষবর্ধন একটা সুদীর্ঘ নিঃশ্বাস ত্যাগ করলেন।



Harshabardhaner Akkalaav by Shibram Chakrabarty



For More Books & Music Visit [www.MurchOna.com](http://www.MurchOna.com)

MurchOna Forum : <http://www.murchona.com/forum>

[suman\\_ahm@yahoo.com](mailto:suman_ahm@yahoo.com)

[s4suman@yahoo.com](mailto:s4suman@yahoo.com)